

FAVOLE MORALI

SCRITTE

IN TERZA RIMA PIEMONTESE

DA MESSER

EDOARDO CALVO

Io v' offro i carmi alla stagion del pianto;
Ma canta il Cigno allor che muor, nè fia
Chi nieghi al Cigno moribondo il canto.

DEODATA SALUZZO

TORINO 1814.

Presso la Vedova POMBA e Figli
Libraj in principio della contrada di Po N. 1.



PROVINCIA DI TORINO
BIBLIOTECA

Legato Anselmi

OA. - b -

3

INTRODUZIONE

La favola è un frutto di tutti i tempi, e di tutte le Nazioni.

Diffatti dopo un tempo immemorabile gli Asiatici vantano, e conservano le favole di Lochman, chiamato da essi per ragion di queste il Savio; gli apologhi di Bidpay antico Bracmano, dimostrano quanto remota sia l'origine della favola, già conosciuta però dopo tanti secoli dalla più antica e popolosa nazione del mondo, come pure dagli Egizi, i quali solevano parlare con delle immagini, delle allegorie, e con parabole. La Metempsicosi ancora, persuadendo che le anime umane passassero poscia ne' corpi degli animali, in molti de' quali si vuol supporre un linguaggio, lasciò credere che essi potessero esprimere parlando le loro idee; e quindi i poeti si permisero di far questi liberamente parlare, servendosi di tal finzione, per introdurre in scena la morale a confronto coi vizi, e mostrare a mano salva, e meno aspra la verità.

Così Esopo in Grecia (quantunque schiavo) credè, e rese pubbliche le sue favole; presso ai Romani, e sotto al regno stesso di Tiberio, Fedro scrisse le sue favole: e dopo lui Aphtanius, Avienus, Gabrias seguirono tal norma, come pure Faernes, Abstenius, Camerarius verso la fine del 16.^o secolo. Cento anni dopo comparve in Francia Hegemon, e sotto al difficil regno degli ultimi Luigi, La-Fontaine, Marmontel, Voltaire, La-Motte, e Dorat scrissero le loro favole.

In Italia pure il Passeroni, il Roberti, il Pignotti, il Sachetti si distinsero in tale carriera, come pure Gay in Inghilterra, Yriart in Spagna, Gellert in Sassonia, Lessing, Gleim, Lichtwehr, Pfeffel, Hagedorn in Allemagna.

La favola adunque è un frutto di tutti i tempi, e di tutte le Nazioni . . . nè deve sorprendere, se in Piemonte, e in questi tempi ancora trovisi taluno, il quale colle deboli sue forze, tenti seguire il padre Esopo.

Io adunque chiamato al sollievo de' miseri in questo Santuario de' sospiri, e cinto sempre dall'immagine del dolore, e della morte, non fia meraviglia, se per solazzarmi un poco intraprenda a scrivere favolette,

Carminibus quaerens miserarum obliviam rerum.

FAULA PRIMA.

L'INTENDENT E 'L POUJ

VERS l'an dla creassion mila e trzent;
 Cioè dnans dl diluvi, j'animai
 L'avio la parola, e 'l sentiment;
 Anssi j'è chi pretend ch' al *Paraguai*,
 Ant 'l *Mississipi* ancora adess
 Le bestie e j'abitant a parlo uguai:
 Così souta coul clima a lè permess
 Ai givo, ai prpojin, ai can, ai gat,
 D'risponde biff e baff al Re istess:
 E mi ant un manuscrit rusià dai rat,
 I l'hai trovà na nià d'sti racont,
 Ch'a son tuti datà dal sent e quat.
 Fra-j' atri ai n'era un lepid pr l'appont
 Tra un Pouj, e n'Intendent, ch'era *Comess*
 D' *Xersse*, 'l qual regnava sl'Ellespont;
 Sto-sì l'era un fachin costrutt espress
 Pr stè con la canaja sui canton
 A ramassè i stivai, vende se stess.
 Ma pur la bonna-grassia d'so patron
 L'ha fane un Intendent li su doui pè,
 Con spà, pruca, e visti caria d'galon.
 Senza conosse l'ombra d'so mestè,
 Savend appena scrive e fe so nom,
 L'è stait an dontrè-di brav finanssiè;
 Scortiaa tant i rich, coum' i pover' om,
 Creava a ogni stagion di neuvi tass,
 Trattava col pajis Nosgnour sa com!

Vistiendsse un di, s'è vist coure su un brass
 Un pouj . . . mes-an-riand: e ti birbant
 (Ai dis) sui me galon t'na vas a spass?
 E credstu ch'i sia un mendicant,
 Un gheu, un om d'la plebe, un disgrassià,
 Un sccianga-fanga, un pover, un furfant?
 A l'è coula gent-li, ch'son condanà
 A esse rusià viv dai verm' dai pouj,
 Ma-nen un om, ch'a l'ha l'or a palà!
 Che gran distanssa j'elo peui tra noui,
 (L'autr ai rispond) savive forsi-nen
 Ch'j'ouma l'istess impiegh e mi e voui?
 La differenssa a l'è tra 'l pi e 'l men:
 Dl rest noui i vivouma e l'un e l'aut
 Dl sang dla povra gent e dl so ben;
 E com ant la natura un mangia l'aut:
 L'aragn mangia la mosca, e peu i strunei
 Ciapo l'aragn, e peu 'l farchett pi aut
 Grimpa quand ai arriva j'aitri osei,
 Fin tan ch' 'l struss, o l'aquila, o 'l milan
 Divoro peu l'farchett da bon fratei;
 Così l'è pi che giust, che un pouj pian-pian
 A rusia pr drit publich n'Intendent,
 'L qual l'ha già rusià 'l gener uman.
 Oltre d' loli: noui doui souma parent,
 E mi se i l'hai da dive la vrità,
 I son vostra progenie an discendent;
 Mi son fait da na Lendna mac jer dla,
 La qual a l'è peu fia d'coule tai
 Ch'j' avie ant i cavei quindes-di-fa.
 Ditt l'ò 'l Pouj vola via, e l'aut sonai
 A resta tutt brodà con tanto d' nas,
 Sentiend che 'l Pouj e chiel a l'ero uguai,
 E fait dl istessa pasta e dl istess vas.

(7)
FAULA II

LE SANSSUE E' L BORGNO

A l'era ant la stagion che 'l Soul bujent
A brusa la sicoria e i barbabouch,
E tuti a scapo a l'ombra, e serco 'l vent;
Un pover borgno vej e patalouch,
Noujà dal gran calor e tormentà
Dal mosche e dai tavan, tutt a tatouch
Andava apress disnè darè d' soua cà,
Dov' j' era una bialera, e un sit ombrous;
E là s' strojassava e piava d' fià;
E bin che chiel a fussa timorous,
Savend d' esse sicur, d' nen esse vdù
A piava soens di bagn bin delissious.
Un di-fra-j'aitri, essend là patanù,
Ass sent morde le gambe, e dè d' pssion,
Pi fort d' lò ch' a l'aveissa mai sentù.
Cos-è-sò? chielo ch' mord? . . . tutt a taston,
Treuva ch' a son d' baboje an forma d' pess,
Ch' a dvento curte e lunghe a l' occasion:
Quantunque a l'abbio faje un pò d' ribress,
Ai dis . . . sure baboje lassè-stè,
Vouli rusieme viv sì bele adess?
Una sanssua ai rispond: lassene fè:
Noi i tirouma nen, che 'l sang già guast,
Pr-tan ch' i deurve j' œui, peusse scciairè,

Noi aitre i conoussouma dall'anast
 Dov' a j' è d' sang cattiv, e nostr istint
 A lè d' sagnè la gent com' i poulast.
 'L Borgno sentiend lò, l' è stà convint,
 E subit ai rispond: se a l' è così
 Sure baboje, ij prego a deje drint;
 Ch' a ciucio pura tan ch' ai fa piasì,
 Basta con lò mi peussa deurvi j' œui,
 E vdde ancour na vota 'l soul d' mesdì,
 Dl rest i m' racomando, prchè peui
 A l' abbio discession an sul rifless,
 Che i son un om d' età, pare d' sett fieui.
 Ste Boje ch' ero veuide già da un pess
 (E tanto-pì ch' a vnìo da lontan),
 A son virassie antorn senza ribress
 A l' han ciucià sto Borgno fin a tan,
 Ch' a comensava già tni 'l col pr stort,
 E ch' a argrignava 'l gambe, e i di dle man.
 Allora 'l pover Borgno tutt smort
 Ai dis: pr carità ciuciè papì:
 Lassè ch' i pia d' fia son quasi mort;
 I m' avì lusingà d' feme guarì,
 D' rendme la vista, e 'lveme 'l sang cativ:
 Ma voi lo tire tutt fin ch' ai n' è pì;
 Aveime compassion, lasseme viv:
 Possibil ch' i sie peui tant afamà,
 Ch' i veuje vdme d' pianta a l' ablativ!
 I l' era dai tavan perseguità:
 Le mosche am tormentavo e 'lvavo d' peis,
 Ma pur tant a l' avio un pò d' pietà!
 Voi-aitre i sè taccante coum' la peis,
 I rusie tant 'l maire com 'l grass:
 Mangerie 'l bin d' sett Gesie an dontrè meis.

Così parlava 'l Borgno ant coul paciass;

Ma j' aitre fasend finta d' nen senti

Lo seguito a ciucè senza ambarass.

A l' era verament lì pr murì:

E j' aitre a seguitavo . . . a segno-tal,

Ch' appena l' ha avù d' fià pr podei di:

Pietà sure baboje ch' am ven mal,

Ch' am crdo, chi son mort, i son dstiss,

L' ai pinen d' sang da empì mes un bocal.

Diffatti a s' è argrignasse com' n' ariss,

A lè restà convuls, e strepitand

A j' ha schissaje mese ant col mojiss.

Sta favola ch' i lese an sghignassand,

Veul di ch' venta guardesse da coui tai,

Ch' a vivo pr 'l mond an criassand

Balsamo e sparadrap pr tuti i mai.



FAULA III

PLATON, E I PITO

NOJA' dal sempre vive an caponera,
 Da stè sarà ant 'l giouch, e d' esse innà
 A spass con un bachet da na vachera,
I Pito ch' ant l' onour a son dlicà,
 E ch' a son nen bagian com' l' mond pensa,
 Contra di poulajè l' han congiurà,
 Decis d' ricuperè l' indipendenssa,
 E d' vive an comunion com' j' aitari osei,
 Ch' a mangio ant 'l granè dla providenssa.
 Pr lò tutt ant-un-nen veri fratei
 Fasend i so complot da nascondon,
 A son levasse an massa da ribei:
 E l' han spedi sul camp na commission,
 La qual second la norma ch' a j' han daje
 Doveis portesse subit da Platon,
 Pregandlo, ch' a l' aveis un pò agiutaje
 A fesse una republica deo lour;
 Da già ch' loli pr chiel ero d' friaje.
 Van da Platon, e là cousti oratour
 Slongand so pouret-rouss con j' ale basse
 A pio la parola con calour,
 Disend: salve Platon . . . souma portasse
 Noi-aitri sì da voi, tuit deputà
 Dai Pito, ch' finalment son sollevasse,
 Prechè ch' a veulo vive an librtà,
 Parei dle grue, di tourd, d' j' anie sarvaje,
 Di cornajas, d' le passre e dle pondrà;

J' ebreo e i polajè j' han obligaje
 A forza d' crudeltà, forza d' patele
 (Avendne scanà tanti e peui rusiaje)
 A dè peui finalment an ciampanele,
 A ribellesse tuti e gros e pcit,
 Prtan salvè soa pel da stè gabele.
 Onde i vouroma un codice pr-scrit,
 Dont ai sio notà precise e ciaire
 Le legi, 'l pat social, e i nostri drit;
 Pr-lò voi gran Platon, se pur i paire,
 I deve nen neghene sto favour,
 'L qual a cousta a voi poc o pavaire;
 Voi fè loli an riand, nuffiand na fiour:
 Voi na costitussion la fè sout gamba,
 Mentre a coustria a n' aut pene e sudour;
 Se pur nostra domanda a lè nen stramba,
 Formene una republica an manera,
 Ch' a senta 'l democrat, o ch' a s' j'aramba.
 Groupandse i barolè con na zartiera
 Platon senssa gardeje . . . o che mincion
 (Ai dis) soussi pr voi lè na chimera:
 Ai veul pr ariussì lò di talenton,
 Ai va di finanssiè, di generai,
 D' minist, di comissari, e nen d' coujon.
 Se i veule me proget mi v' lo darai:
 Ma pr l' esecussion, e pr capilo
 I manche d' coule teste originai.
 Scusè mssè Platon: ognun peul dilo,
 S' la nostra rassa è bona, e se a riussiss,
 Anssi i tre quart dl mond peulo sostnìlo.
 Noi-ait j' avouma d' Pito ch' a stupiss
 A vdde quant savej l' han ant la gnuca,
 Quanta robassa a l' han ant 'l cupiss!

A son d'originai tuti da pruca,
 Tajà pr esse intendent, esse minist,
 E lò ch'iv' conto-si l'è nen na cuca.
 Guardè . . . senssa studiè, senssa avei vist
 Gnun leu, mac sul teatro le bataje,
 A dvento generai, e fan i trist;
 Mostrand 'l mondo-novo a le maraje
 Amprendo a regolè j' affè d' stat,
 E buto 'l drit dle gent con le batiaje.
 Lesend Brtoldo a dvento diplomat:
 Lesend Guerin-meschin, minist d' finansa;
 Fasend 'l saccagnin dvento avocat.
 Anfin poudoumo dilo con baldanssa,
 Ch'an tuta sort d'impiegh pi luminos,
 I Pito han conservà la maggioranssa.
 Platon sentiend loli tutt pensierous
 Ai dis: mia cara gent, vad a occupeme
 A compileve un Codice pressious:
 Intant i peule andevne e nen secheme,
 Portè la neuva ai ait, dije così,
 Ch'a l' abio la passiensa d' aspeteme.
 Così l' han fait, e tuti a son partì;
 Intant un messagè ven avertije
 Che 'l Codice lè fait e lè finì.
 I Pito a sauto d'goi, e a s' buto a rije
 Criand tuti d' accord, presto dov' elo?
 Lese j'articoul fort; venta sentije!
 A s' buto tuti ansem a scrutinelo,
 E peui esaminand a l' han trovà,
 Che lour savio un foudre coum dovrelo.
 Sta favola veul di, ch' a venta pa
 Cariesse pi d' fagott ch' un peul portene;
 E pr fè 'l cont dla speisa ant nostra ca
 A venta ciamè gnun ch' vena agiutene.

(13)
FAULA IV.

I SCALAVRON, E J'AVIJE

NA nià d' Moscon scapà dant un fornèl
A forssa d' scopas e d' abuton
Intra ant un buss d' Avije pien d' amel.
Ste-sì l' han avù pour d' coui barbison
Dl mouro piat, dl vistì secur, di stivai lust,
E son strmasse tute ant i canton.
J' aitre trovand l' amel ch' avia bon gust,
Trovand j' Avije divise an doui parti
Son fasse lour padron com' a lè d' giust;
Jè sta pignun mojan d' feje surti:
L' ero crudei e dur coum d' scalin,
E a forsa d' ujonà s' fasivo ubdi.
Vedendse a la miseria na matin
J' Avije pì decise a fan consei,
D' andè trouvè l' Argina ant so cambrin,
Pr vdde qual parti saria sta' l mei
Pr dè la palà-al-cul a sti tavan,
Ch' j' avivo già rusià mesi i coutei.*
L' vout preponderant dl gran divan,
Lè stait d' spedì prest n' ambassadour,
Ch' andeissa vers la val dl Rabadan,

* *Gli alveari.*

Dov' j'era sula sima d' una tour
 Una tribù famosa d' Galavron,
 Ch' fasìa mac la guera pr l' onour;
 E là ch' a j' esponeis la situassion
 Dle soe finanse povre e dl so buss,
 E la rapacità di brut moscon.
 Disendje: se ant vost cœur ancour ai fuss
 Un pò d' misericordia, e un pò d' pietà
 Pr tante povre Avije ch' son ai uss,
 Adess lè temp d' usela, e d' avnì là
 Con na legion antrega d' tiralieur
 Tuti caussà, visti, e bin armà.
 'L cap di Galavron *zin-zon-val-fleur*.
 (Ai dis), ambassadour crussieve d' nen,
 Noi souma penetrà d' vostri maleur.
 Risponde a vostra Argina ch' son an tren
 Tuti i me bravi, e voi an dontrè-di
 I rivedrè l' aurora, e' l Ciel seren.
 Noi i vnicrouma espress pr custodì
 Vostr' amel, vostra sira, e vostre ca:
 Cioè pr libereve e niente d' pì.
 Eroe Galavron, dunque a sarà
 (L' autr ai repet) da coui bruti barbis
 Nettià la ca dj' Avije e liberà?
 Ah voi i sarè sempre nostr' amis:
 Noi i farouma an sira un monument
 Tribut d' riconossensa a vost pajis!
 Dit lò soupata j' ale e part content,
 Porta la neuva ai aitre, e all' indoman
 Sento sonè le trombe vers ponent.
 L' armada arriva li tambour batan:
 As vddo contra 'l soul tuti a lusi
 J' abitatour dla val dl Rabadan.

Taco bataja, e-li i Moscon ardi
 Apres esse difeis con gran calour,
 A son restà disfait e sbalurdi;
 Ma appena i Galavron son vinctour,
 A son bütasse lour a comandè,
 E j'han robaje 'l rest ch'avio ancour;
 J'Avije desperà s'buto a piourè:
 Disend oh iniquità! elo così
 Ch'i l'havi promettune d'tratè?
 Zin-zon a l'ha promess d'mandevè sù
 Pr avnine liberè, dene bras-fort,
 Ma nen pr sacheggiene i nostri nì.
 E voi pr la rason ch'i se pì fort,
 J'avì scassà i tavan pr piene 'l rest:
 Oh com l'è deplorabil nostra sort!
 Giovnot i parlo a voi con sto pretest;
 Sta sù lè mac na favola, lè vei:
 Ma pur a l'è un esempi manifest,
 Ch'arriva tuti i dì fin tra fratei.

LA PASSRA-SOLITARIA E LA BERTA

NA Berta ch' a scapava dal pajis
Distruta dala fam, dala vrmina
A l'era capità dssà dl Monsois;
Virand pr la pianura sta sgualdrina,
E svolassand pr là vers dl Sangon,
A s'era ritirà ant una boschina,
E là cantand al solit soa canson,
Fasend dji sgari rauch, mila smorfiasse,
Mostrand 'l cul, cercava a desse d' ton.
A s'era con ste ghemne caparasse
I merlo, i torsacoi, j'orieui e i gai,
E tuti d' sta pest son namorasse.
Sercavo l' un pr l' autr d' feje d' regai,
E chila a j' antascava le grumele,
Fasend ancour le smorfie a sti sonai;
Disendie ch' l' ero goffe soe fumele,
Ch' a l' ero bone a nen, l' avio gnun deuit,
Ch' a smiavo pr cantè tante crivele;
Sti povri torsacoi ch' a l' ero cœuit,
Sentiend couste rason, tuti pien d' ira
Ai guardavo pinen nè di, nè neuit.
Le cose a l' ero vnue a cousta mira,
E ste povre fumele disgrassià
Fondio an piorassand parei dla sira.
Distruta dal sagrin e soffocà
Forsa d' sangiouss na passra solitaria,
A l' ha sercà d' commeuve soa mità,

Butandse na matin a cantè n' aria
 Piena d' cadensse e d' son tan melodious,
 Ch' avrio commoss na tigre sanguinaria.
 Disendie con un ton e con na vous
 Piena d' amour . . . e voi vouli chiteme?
 E voi veule pinen esse me spous?
 Che ombra d' mancament peule imputeme?
 Nen-aut prchè ch' i v' hai amave trop,
 E pr-loli voi veule abandoneme!
 Disendie lò, lo ved ch' andava sop,
 E ch' a poudia pinen sauté sle rame,
 Prchè tuti i branchett j' ero d' intop.
 La Passera ai soggiuns . . . cos' m' eve fame?
 Dimlo, feme 'l piasì, parleme ciair?
 Oh s' i t' saveisse (ai dis) lò ch' m' è rivame:
 La Berta a m' ha sedoutt e mname al sgair:
 A m' ha tacame 'l mal dla caussinera,
 E peui apress d' loli m' a fait fè ciair!
 Possibil (chila ai dis) ch' loli sia vera?
 Che trop (l' autr ai rispond) e tuti j' ait
 A son tuti tratà d' sta manera!
 'L torsacol lè tisich, e lè andait;
 'L merlo a s' è ciapasse un porta-coa:
 L' orieul l' ha 'l prè ch' ai dagna e mes dsfait.
 'L gai a l' ha dcò chiel trapà la soa;
 E mi cara mojer s' a va così,
 Miraco se i poudrai pì fè la roa!
 Amprendè voi giovnot e guardè-li
 Cosa as guadagna a coure apres dle berte
 Ch' a veno da lontan . . . scouteme mi:
 Lasseje ai cornajas, a le laserte.

FAULA VI.

'L CAN E L' OSS

Pa là sle rive d' Doira drint an foss:
 Soutrà tutt ant la nita, e mes rusià
 Un can-passavolant l' ha trovà n' oss:
 Ch' era l' avans d' un Tor dsfortunà,
 'L qual robust, e grass, e su so bon,
 Tacà dal mal dle bestie era erpà;
 Vedend coula pitanssa an abandon,
 Sto can ch' era un eroe pr l' aptit,
 A s' è virassie antorn a sganasson.
 Fasia dj strangojon tutt-aut che pcit:
 Tacava con le grinfe e con i dent;
 Quand l' oss tut dspolpà, tut derelit
 Comenssa a fe un sospir, peui un lament,
 Disend: ferma, crudel can affamà,
 N' astu nen prou, sestu ancour-nen content?
 Guarda ch' i son un oss scarnificà:
 'To frei l' han già mangià le polpe e 'l cœur:
 I resto sì mi sol tut desolà!
 Ch' a t' fassa compassion sto me maleur,
 Pensa che i l' era un Tor desiderà
 Dai vsin ch' ero invidious dl me boneur.
 A l' è già da tant temp ch' i son cougià
 Drint a sta tampa, e gnun am dà rinforss,
 Anssi dai me pì car son scarpisà;

I peus pi nè criè, nè fè gnun sforss:
 Im treuvo-sì distrut, e pr mia sort
 Espost a essi rusià da can e porss!
 Scouta, ai rispond 'l can . . . it has gran tort
 A tñime sto discours: e sastu-nen,
 Che tal è sempre stà 'l dritt dl pi fort?
 Le cose andaran sempre su sto tren,
 Prchè Natura a veul, che j'animai
 Pi gross mangio i pi peitt, ma bada ben,
 Che i gross antra lour-aitri a s' mangio mai;
 E venta che i cardlin coum a lè d' giust
 A servo pr pitanssa ai Papa gai.
 Dl rest prchè conteme i to dsgrust:
 Mi scouto nen loli quand j' hai aptit;
 E peui sti nom d' pietà, son nom già frust.
 It deve esse content d' lò ch' i t' hai dit:
 Se it veule piourè, pioura, am na fa pòch:
 Mi i seguito a rusiete, e tiro drit.
 Così l'ha fait, ma pr maleur un toch
 Dl' oss ch' a rusiava ai resta ant' l' gariot,
 Piantà ant la garsamela coum un stoch.
 Soussì v' serva d' esempi a voi giovnot,
 Pr mai bravè la gent dsfortunà,
 Nè mai tratè j'opress dà Ottentot;
 Crdme, che tante cose già soutrà
 Arsuscito quaich vota, e pio' l vol.
 E tante ch' un je cred già tracanà,
 A peulo peui restene un di ant' l col!

FAULA VII.

LE PECORE E I PASTOUR.

A j'era sna montagna un bon Pastour,
 'L qual avia rimess tute soe Feje
 Ant j' unge d' un birbant so servitour;
 Stossì non pà d' nutrije e d' pastureje,
 A l'era neuit e di tavota an tren
 A pieje 'l lait, e 'l bur, e tosoneje;
 Un di li vist-e-pris, senza di nen,
 Mentre i mouton, 'l troup l'era ant la stala,
 Tut sol, zichin-zichet, 'l padron ven.
 Le pecore dla goi ai sauto an spala,
 Scalamand tute d' acord . . . ah seve-sì!
 E chiel a j' ha rispost: e bin com' vala?
 Va mal, com' a peul nen andelo d' pì;
 I souma-sì ridote ale bsognette
 Senza podei criè, fesse sentì;
 A j' è coul vost garsson, pr vagnè d' psette,
 Ch' a n' buta tute quante ai isiboè,
 Gavandne se a podeiss fin le grassette.
 Disend loli, j' ariva sto grivouè,
 E l' autr s' j' è vira antourn, e ai dis: com' ela?
 Cos' elo sto trafili sur Fransouè?

Sapia, chi n' hai già piena la scudela !
 E 'l lait, le toume-grasse, 'l bur, j' agnei ;
 La lana ch' t' has robà . . . porco dov' ela ?
 Scoutè, me car padron, venta savei ,
 Che sì tutt a l' intourn pr ste boscaje
 I luv a son pì spess quasi ch' j' ousei ;
 E i dnè ch' j' hai guadagnà, j' hai impiegaje
 A feje dè la cassa dai paisan ;
 E voi peule pensè ch' j' abbia robaje ?
 Na Pecora ai rispond . . . oh che bagian !
 Prechè scortiene tan pr dè la cassa
 Ai Luv, ch' j' ouma nen vist nè noi nè i Can !
 Pr coula-lì me car a lè trop grassa :
 L'è na rason tacà mach con d' spuv ,
 L'è voi ch' i sè farsive la pansassa ;
 L'è voi ch' n' avì rusià , son nen i Luv !

*La montagna fa buoni gli uomini ;
 Ed i buoni pensieri, e ispira le buone azioni —*

*Quel che vuole disprezzare, ben sovente
 vuol comprare
 Montanini e contadini, scarpe
 grosse e cervello fini,
 Se canta non canta, di lui non domare*

FAULA VIII.

LA SPA E LA LUMASSA-RABLOIRA

ANT un d'coui Castei frust ch'ai stà le Masche
 Famous ant i so temp pr soe gran tour,
 Sgarblà, tut-mes distrut, cuvert d'frasche:
 Pr là ant una caverna a j'era ancour
 Soutrà n-mes al rotam, a la rumenta,
 La Spa ch' un di portava coul gran Sgnour;
 A l'era mancomal tuta rusnenta:
 Ma tant an mes al ruso, un sert barlum
 Mostrava ancour l'origine lusenta.
 Rablandse, coum, a l'è ant 'l so costum,
 Slongand i corn na Lumassa-rabloira
 A j'è montaje adoss caria d'bavum.
 La Spa s' buta a criè . . . son pa na mssoira,
 Am pijsto pr na ressia o pr un fausset,
 Pr n'appia pr na ranza, o na tisoira?
 Sapia, che mi ant 'l secoul d' Bajaset,
 Ai temp d'l Re Arduin e d' Carlo-Magno,
 Tajava i Paladin com' d' ravanet!
 E adess (l' altra ai rispond) mi t' scareagno;
 S' i veui mi it pisso adoss, e con i corn,
 Se mi m' bateiss con ti, tant it guadagno.
 Sta Faula a dev gaveje 'l cap storn
 A coui ch'a vivo mach pr ampisse d' boria;
 Butè na pugnà d' paja drint an forn,
 A fa l' istess effet la nostra gloria.

FAULA IX.

LA CIOUSS E LE POULE.

VENTA nen ambrassè tutt-lò ch' fa goi,
 E nen mesurè 'l vin mach da la ponga;
 Se un veul nen esse pià parei dj foi;
 Ass perd chi monta an barca su na sponga;
 E prima d' anfnoujesse ant quaich' affè,
 Venta consultè i vej ch' a la san longa.
 Na nià d' Galine giovò, da mariè,
 Forssa d' senti vantè 'l marcà, la fera,
 Son pignatrasse ant lò d' voreije andè:
 A l' han tirà daspart la Masovera,
 Pregandla ch' ai buteissa ant un cavagn,
 E ch' ai arcapiteissa an quaich maniera:
 Disendie, ch' lour l' avio già i so agn,
 E ch' a vorio nen dventè pì veje
 Pr vedsse tanti such setà su un scagn.
 La Masovera ai dis pr consoleje,
 Ch' a steisso pur sicure, ch' saba-quen
 J' avria portà a Turin pr arcapiteje;
 Ste Poule sentiend lò, senssa di nen,
 A couro da la Ciouss... mare arlegreve,
 Saba Catlina an porta a vive ben.
 Oh fie spensierà! cosa penseve:
 Apena arrivà-là, v' sautran a col
 Siquanta cusinè pr palpegieve;

Toucand pr drit, pr storf e 'l dur, e 'l mol,
 E voi chi sè pitost li polpassue
 A risigo sul coulp d' tajeve 'l col!
 'Av piumran tute, e bele patanue
 Av casso ant na marmitta, av fan rusti,
 E voi mie povre done i sè forslue!
 Ala sità le gent, l'è nen-'l-dì,
 A son così galup d' mangè d' carnassa,
 Ch' a treuvo 'l bon, e 'l gram tut savuri.
 La povra vaca-grisa . . . cla mairassa,
 Che i luv sario pignanch andaje antourn,
 A l' Ospidal han dit, ch' a l' era grassa!
 Guardè . . .! mi stessa, mi l' avria pour,
 Quantunque i sia na Ciouss veja stransia,
 Che là quaich sur Economo Inspetour
 Am feissa con tut-lò passè pr fia.

FAULA X.

'L BALON-VOLANT E LE GRUE

UN gros Balon-volant ch' s' era elevà
 An aria con un ton d' magnificenssa,
 Incontra un voli d' Grue pr la strà;
 Chiel-sì, gonfi d' se stess, dla soa presenssa,
 Pensand d' essi patron dl ciel, di vent,
 A j' ha ciamaje tute all' ubidienssa,
 Disendje: e voi chi seve? . . . e che ardiment
 D' avnine an paradis sechè la gloria,
 D' andè così spasgiand me apartament?
 I veui pingen suffrì sta vostra boria,
 E s' voi pretende ancour d' aussè 'l cachett,
 Pensè ch' i peuss fiacheve la sicoria.
 Le grue sentiend lò, piene d' dispett
 A j' han rispost . . . e voi che bestia seve?
 Chi v' ha portave sì l' elo 'l Foulett?
 Prchè ch' j' aspete ancheui mach a mostreve?
 Dalloura ch' noi i vnouma su-da-sì,
 E pur n' è mai rivane d' incontreve!
 (Ai replica 'l Balon) adess a mi:
 Gher, ch' i vad a feve na bignetta!
 Parti gheusaja, presto, eve capì!

Ma disend lò s' dsstaca la scionfetta

Dont a j' era 'l feu sout, e 'l gran Balon
A l'è restà rupì giust coum' n' erbetta.

Sta Faula a veul di ch' a son d' mincion

Coui-tai ch' a son d' subrich e s'levo an aria

Prchè ch' a son guarnì d' piume d' pavon,

Venta pensè ch' l' vent quaich vota a varia,

E coui ch' a son mach gonfi a forssa d' fum,

Se ai capita na bisa un pò contraria,

A perdo 'l feu da sout, e so volum.

F A U L A X I.

LE TRE VIRTU' A L' OSTARIA DLA PAS

AVEND, com' i savì, fait banca-routa,
 Trovandse a mal partì, d' pianta ale grele,
 Con na scudela d' bosch, e con soa bouta
 Andavo tapinand le doe sorele,
 Cioè la Bona-fede e la Speranssa,
 Vendend j' armanà-neuv, le storie bele;
 E pr la pì curiussa circostanssa
 Essend assassina, strache dalviagi,
 All' ostaria dla Pas l' han pià na stanssa
 Pr desse un po' d' ciadel ai so bagagi.
 E casualment tra lour vnend a discoure,
 Esclama la Speranssa... fè couragi,
 I spero ch' i l' avrouma finì d' coure,
 Prchè s' me canocial m' ha nen tradime,
 I sarouma a bon-port fra poche ore.
 L' è vera ch' fin-adess i son falime,
 E ch' i l' hai sempre vist d' castei an aria:
 Sorela... ma i sè voi ch' j' avì andurmime!
 Disend loli, s' presenta con un' aria
 Smorta, mesa scarnà, tuta piourosa
 Na Dona verament nen ordinaria:

Ma a l'era mal fourgià , bruta , scarousa ,
 E andava brboutand 'l *dies irae*
 Ciamand pr le sing piàghe un po' quai-cosa.
 Chi seve? (una ai rispond) ... forsi ch' i vire
 'L mond com'fouma noi ... da-dont avnive?
 A smia ch' j' abie mal , e ch' i sospire!
 Am riconossve-nen? prchè stupive?
 I son la Carità vostra sorela ;
 E voi , mie care seur , seve ancour vive?
 D' l colp j' aitre l' ambrasso pr basela :
 E chila a j' ha soggiunt ... o Fije, guardeme,
 Guardè ant che stat a venta ch' im rabela !
 A j' è pinen un can ch' veuja alogieme ;
 Trovandme disperà , son fin andaita
 Ciamand ai Ospidai pr ricovreme ,
 Ma cosa servlo mai ! tant i son staita
 Sforssà dal freid , la fam , e la miseria
 A scapè da là-drint , sno j' era feita !
 Pr vive còusi esposta all' intemperia ,
 Abandonà da tuit , sempre schergnìa ,
 Sorele , i l' hai decis d' andè an Siberia.
 Eh-bin noi iv farouma compagnia :
 E forsi ch' ant coul clima noi trouvrouma
 An mes a coula gent dura , abrutia ,
 La pas e coul boneur ch' i sospirouma.

FAULA XII.

I STRUNEI E I MERLO.

TRE Merlo senza pnass, mairi e spnicì
 Ch'andavo pr lou mond serchè fortuna
 Prchè ch'a so pajis l'ero sbianchì:
 Viagiand na bela seira al ciair d'la luna
 L'han vist su na briccola un castel vei,
 Ch'era mes ruvinà, seur com' na truna;
 A smiava propri fait mach pr' j' ousei:
 E casualment anloura ant coui drocheri
 A j' abitava un voli d' Strunei,
 I quai fasíó un tapagi, un armisteri
 Subiand e gasoujand ficà là-drint
 Lontan dai guai, dal mond, dai intemperì;
 Sti Merlo sentiend-lò second so istint
 Son presentasse-là con tola franca,
 Criand antra lor trè, com' fusso vint;
 Disend: Noi vnoumo adess da Salamanca,
 J' ouma pensà d' fermesse ant vost pajis,
 Pr vende i nost pachet d' magia bianca;
 Ma com' noi-aitri i souma bon amis,
 Prchè ch' i nost costum, 'l tap, la lingua,
 A veulo che tra noi vivo indivis;

Talment, che a mala-pena pi ass distingua
 Dai unge e dal bech giaun Merlo e Strunel,
 E la rivalità, l' odio s'estingua;
 Così s'j' avesse bsogn ant vost Castel
 Pr d' roba d' interess, d' economia,
 D' un pian pi rafinà, verament bel;
 Pr deve un contrassegn d' Merlantropia
 I souma-sì dispos, fè capital,
 Noi comodrouma tutt a maravia.
 Portene piuma, carta e caramal,
 E lassè fè da noi, con dontrè zero
 I liquidroumo i frutti, e 'l capital.
 Ditt-lò, 'l Strunel pi vej, ch'era un bodero,
 An mes a doui Lachè con d' lanternin
 Ai dis . . . ben arrivà compare Pero!
 E subit piandie tuti pr n' ongin
 At meno a pè-sopett ant l' assemblea
 Con j' atri so Strunei consitadin;
 Disendie: guardè-sì nostra ciambrea,
 I la trouvè nen vaire d' vostr gust,
 Mah! sti temp-sì fan strense la courea!
 Noi-aitri iss n' abitouma st castel frust
 Prchè ch' a lè lontan d' ogni tapagi,
 E ch' si vivouma an pas e senza sust;
 Ma un Merlo a j' ha soggiunt . . . a lè un darmagi!
 Oibò . . . soussi lè gram . . . oide . . . maipì:
 Com' elo, ch' iv na stè 'n coust armitagi?
 Da noi che diferenssa! aut che soussi:
 Da noi tutt alè rich, tutt a respira
 La pompa, l' eleganssa, e 'l pur piaşi;
 Da noi le pere a son mole coum' sira,
 Da noi la Mana a pieuv fina sul giouch:
 Da noi le cose a son tutt altra mira!

Voi aït, mia cara gent, se' d' prataloch,
A venta deve d' ton, pié d' energia;
Gnarde', darsin a noi se' d' barbatock!

E l'ant a j' a rispost... Ma vussuria
Dorria dco insegnene a durvi j' èni,
Mostrandue a riforme' nostra famia;

Ch' as bnto, e ch' a comensso fin d' anchëni,
Ch' a fasso tut second ai taca l' verlo;
Lorait faran da pare e noi da fiëni!

Staroma tuti chiet, gnun farà d' l' erlo,

E nost bonëur i spero ch' a sarà

L' efet dla gran bonta' d' lor signori Merlo!

Senza che mi lo dia un presunrà

Qual a l' è stait l' frut d' soa bona fede;

I merlo an fait i singher, son scapà.....

E cola sarà sempre la mercede,

Ch' a l' avran i badola, i foifotà;

Le gent a fan j' amil per le monede,

Ma lo fan mai për chëur e për virtù

Su la vita
d' campagna

Ode

Com' l'e' mai levida,
L'e' mai bagiaña
L'idea ch'a stussica
La rapa umana,
Ch'ant le metropoli,
Dov' le gent vivo,
Insuro e bulico
Parei dij giro,
Cola sia l'unica,
La mei maniera
D'vive anss la tera!

Prchè ch' là ass pratica
 D' gran personagi ,
 J'è d'ca magnifiche ,
 D' bei echipagi ,
 D' bouteghe splendide ,
 D' gran eleganssa ,
 D' Magister d' Musica ,
 Dj Mettre d' Danssa :
 L'è pien d' Orefici ,
 D' mestè ch' frastorno ,
 D' Soldà ch' tambourno !

Ela pur l' ultima
 Pì gran arsourssa
 Portè con enfasi
 La spà e la bourssa?
 L'avei dla sipria ,
 D' vistì ch' a luso ,
 Trate d' Bellissime
 Ch' s' ampiastro 'l muso ,
 Vive da machina ,
 Scciav dj caprissi ,
 Dj pregiudissi ?

Cos-mai significne
 Tante fandoni
 Tichette, re
 E sirimonie
 Tute cle visi
 Pr conveniens
 Smorfie ridicole
 Faite an cadenssa:
 Sechesse all' Opera,
 A la Comedia,
 Muri d'inedia?

Pur coust imagine
 Forma la soula
 Beatitudine
 Ch'a meuv la goulà
 Dle gent pì comode,
 Pr colte e sode,
 Ch'a meuiro martire
 Senssa mai gode
 Nè dl'aria libera,
 Nè dla verdura,
 Nè i don d'natura.



Coui di ch'a m'limita
 'L destin ancoura,
 Poudeissne godimie
 Fin l'ultim'oura
 Com' i desidero,
 A na campagna,
 Lesend me Seneca
 Sout na castagna,
 Sentiend le Lodole,
 J'ousei ch' tripudio
 Mentre ch' i studio!

Che vita placida
 Contenta e chietta
 Pr l'om ch'a medita,
 Pr chi s' diletta
 Dj piasì semplici,
 D'na sort onesta,
 Ch'veul vive, e s'evita
 Lò ch'lo molesta;
 Che vita angelica ...
 Che sort fiouria ...
 Pr mi a sarìa!...

Così m'acapitlo
Ch' i veui nen lese,
Ciapo na gorbina,
Vad pr cerese,
Vad serchè d' ampoule,
D' nespo, d' griote,
Smeno d' tartifoule,
Pianto d' carote:
J' ento dle mandole,
Vad pouè la yigna:
E chi s' n' ambrigna.

Se lolì am nausea,
Che l' estro am passa,
Me can am seguita,
Seurto a la cassa;
Vad pr le gerbole
Sniciand le tane,
O ch' im industrio
Pr ciapè d' Rane;
Tendo dle trapole,
Dj lass, dj' arssie,
Lolì m' fa rie.

Oppure im occupo
 Crousiand le rasse,
 Fass cantè d' Passare,
 Parlè d' Ajasse;
 J' anlevo e propago
 Diverse bestie,
 D' Colomb e d' Tortore,
 D' Anie domestiche,
 Dle Crave d' Angola,
 D' Galine Indiane,
 D' Oche Mantouane.

J' Erbe specifiche
 Pr coui ch' a s' tajo,
 Coui ch' l' han la colica,
 Le frev ch' j' tnaio;
 Pr coui dle scrofole,
 Coui ch' son brusasse,
 Le founne isteriche,
 Pr le scarvasse,
 Pr fè d' l' balsamo:
 Mi ste Erbe i choeujo
 Quand im anoeujo.

Se 'l temp s' intorbida
 Ch' ass buta a pieuve,
 Treuvo an mecanica
 Dj' arsourse neuve;
 M' angigno i fabbrica
 Dj' atrass d' campagna,
 Mila giargiatole,
 D' gabbion d' cavagna;
 Turnisso d' sotole,
 Fass dle ghingaje
 Pr le maraje.

Ma quand s' approssima
 La stagion bela,
 Quand la canicola
 Choeus la servela,
 Oppure all' epoca
 Ch' ass fa 'l vendummie,
 Cantand an musica,
 Ciapand dle summie
 Con la combriccola
 Dla gent dla sapa,
 L'è un stè da Papa!

Tuti *alegrociter*

Con soua boutelia,
 Destiand la Canouva,
 Sfoujand la Melia,
 Con nostra tavoula
 Sout na nouserà,
 Le founne e j'omini
 Setà pr tera,
 Contand dle frottole,
 Mangiand d'salada,
 S' fa la balada.

Lì peui se àss capita
 D'apress dla sina
 Quaichun ch'a bustica
 'N violin, na crina:
 An mes dla ciulica
 Con cle matote
 Leste coum' d'Rondole,
 Ch'fan virè 'l cote,
 L'è propri un godise
 Balene un paira
 Lì bele ant l'aira!

Nissun s'immagina,
 Gnun peul describe
 Quant mai a giubila
 L'om ch'a sa vive
 An solitudine
 Su na briccôla
 Con la gent rustica,
 Con dj badôla,
 Ch'a studia e s'occupa
 D'lò ch'ai peul rende
 Senssa dipende!

Lassand le massime
 Dle Sità grande,
 Chiel va con d'soccole,
 Seurt an mudande,
 Mai nen l'intorbida,
 Gnun Comissari,
 Gnun Rompa-scattole,
 Gnun sur-Vicari,
 Gnun dla Statistica,
 Gnun d'coui dle Boule
 I secco le mioule.

Così chiel evita
 D' senti 'l ciapette
 Dle gent politiche,
 D' coui dle gasette;
 Ved gnun Ippocrita
 Da doui carater,
 Gnun d' coui tai esseri
 Ch'a mastio d' Pater,
 Ch'a dovro d' sillabe
 Sucrà, turnie,
 Peui son d'Arpie.

Tranquil ant l'anima
 Chiel va cougiesse;
 S'arvouita e sgambita,
 Peui torna a 'lvesse:
 Mangia doui sceleri
 Con quaich'faccenda,
 Peui disna e replica
 'N bocon d'marenda,
 E intant a vegeta,
 S'na fa una vita
 Da ver Giusuita.

Oh voi ch'i strepitate
 Pr trovè d'gloria;
 Vojait ch'i lambiche
 D'vive ant l'istoria;
 E voi ch'i giudiche
 Ch' le Sità a sion
 Un ver empereo,
 'L pajis d'lddio,
 Si voi rispondime,
 S'l'è nen meinvive
 Com'i l'hai dive?

DALLA STAMPERIA GALLETTI.



115126